

Script Of Morning Gojri News Bulletin 29 June 2024 at 1015Hrs

ما رنینگ گو جری نیوز بلیٹن مورخہ 29 جون 2024

یوہ آکا شوانی جموں ہے محمد اکرم چودھری تین خبر سُنو۔

Amarnath Yatra

سخت حفاظتی انتظامات غے بشکار 52 تہاڑاں تک چلن آلی سالانہ امرناتھ یا ترہ اج سویرے وادی کشمیر غا دوہاں پہلگام تے بالتال آلے رستے آگے بدھ رہی ہے۔ یا تری جہیڑا گذشتہ روز بالتال تے نوان غا بنیا دی کیمپ مانہ پُجیا تھا، وے اج بابا برفانی غا درشن کر رہیا ہیں۔ واضع رہ جے یاہ یا ترا شراون پُرنیما آلے تہاڑے 19 اگست نانہہ اختتام پزیر وے گی۔ یا ترہ غا سلسلہ مانہہ یوٹی انتظامیہ تے یا ترہ نانہہ با آسانی کرایا جان نانہہ ممکن بنان واسطے خاطر خواہ حفاظتی انتظامات کیا وا ہیں۔ اس دوران 4 ہزار 29 امرناتھ یا تریاں ور مشتمل دوجو جتھو جموں غا بھگوتی نگر بنیا دی کیمپ توں کشمیر واسطے سخت حفاظتی انتظامات غے بشکار روانہ ہوؤ ہے۔ امرناتھ گپھا واسطے جموں غا بنیادی کیمپ توں ہون توڑی روانہ ہوا یا تریاں غی تعداد 8 ہزار 6 سو 32 توڑی پُچ گئی ہے۔

LG Mulaqaat

لیفٹنٹ گو رنر منوج سنہا نے کہیو ہے جے سماج غا ہاشیہ ور رہن آلا طبقات غی با ز آبادکاری سرکار غی اولین ترجیح ہے تے اس سلسلہ مانہہ بکھ بکھ سطحان ور صلاحیت سازی ور لگاتار کم کیو جا رہیو ہے۔ تا کہ عوام ور مرکوز انتظامیہ نانہہ مضبوط بنايو جا سکے۔ گذشتہ روز ورچول طور ر ایل جی ملاقات برائے راست عوامی شکایات سُنیا یا جان واسطے اک پروگرام مانہہ عوامی شکایات تے شہریاں نال گل بات مانہہ لیفٹنٹ گو رنر نے سرکاری اہلکاراں نانہہ ہدایت کی جے وے لوکاں غا مسائل غو اولین ترجیح ور حل کریں۔ تے اس گل نانہہ یقینی بناویں جے سماجی فلاح و بہبود سکیم ضرورت مند لوکاں توڑی پجیں۔ جناب سنہا نے مزید ہدایت کی جے تمام اضلعان مانہہ چل رہی سکیمیاں ور نگرانی رکھیں اور عوام غی شکایات اور اُن غا مسئلاں نانہہ دھیان سنگ سُنیں۔ لیفٹنٹ گو رنر نے پھر دُہرایو ہے جے یوٹی انتظامیہ عوامی خدمات پہنچان غا نظام نانہہ موثر جواب دہ طریقہ نال بنان مانہہ اپنو کردار ادا کر رہی ہے۔

Hiranagar Cops

جموں کشمیر پولیس غا ڈائریکٹر جنرل آر آر سوین نے کہیو ہے جے جموں کشمیر غا کٹھوعہ تے دوجا علاقان مانہہ دیہی محافظ گروپاں یعنی ولیج ڈیفنس گروپاں نانہہ مضبوط بنايو جائے گو۔ اُنہاں نے مزید کہیو ہے جے پولیس تے عوام غو سانجھو تے نیڑموں تال میل دہشت گردی نال نمڑن مانہہ اک بڑی طاقت ہے۔ ڈی جی پی گذشتہ روز ضلع کٹھوعہ مانہہ منعقدہ اک پروگرام غے دوران بول رہیا تھا۔ اس موقعہ ور 9 ایس پی اوز نانہہ جموں کشمیر پولیس مانہہ مستقل کیو ہے جن نے کجھ تہاڑہ پہلاں بیرہ نگر غا گراں سیدہ سُکھل مانہہ اک تصادم دوران 2 دہشت گردان نانہہ ہلاک کیا جان مانہہ اہم کردار ادا کیو تھو۔

Special Summary Revision

جموں کشمیر غا اعلیٰ چناؤ افسر پی کے پولے نے گذشتہ روز یوٹی غی بکھ بکھ تسلیم شدی سیاسی جماعتان غا نمائنداں نال چل رہیا ووٹر فہرستاں ور خصوصی نظر ثانی غا

حصہ غا طور ور جموں مانہہ اک میٹنگ منعقد کی۔ میٹنگ غے دوران انہاں نے سیا سی جماعتاں غا نمائنداں تیں اپیل کی جے وے صحیح تے جدید ووٹر فہرست واسطے ضلع انتظامیہ نال تال میل کریں۔

NTA Exam Date

قومی امتحانی ایجنسی یعنی این ٹی اے نے منسوخ تے ملتوی ہوا امتحان غی تا ریخ غو اعلان کر دتو ہے۔ جا ری اک نوٹیفکیشن مانہہ گذشتہ روز این ٹی اے نے کہیو ہے جے یو جی نیٹ جون 2024 امتحانات ہُن 21 اگست توں 4 ستمبر غے درمیان منعقد کرایا جائیں گا۔ سانجھا طور سی ایس آئی آر یو جی سی نیٹ جون 2024 امتحان ہُن 25 توں 27 جولائی غے بشکار رکھیا گیا ہیں 4 سالان غو مکمل ٹیچر ایجوکیشن پروگرام غا داخلہ واسطے قومی مشترکہ داخلہ امتحان این سی ای ٹی نانہہ ہُن 10 جولائی نانہہ منعقد کیو جائے گو۔ این ٹی اے نے کہیو ہے جے آل انڈیا آیوش پوسٹ گریجوٹ داخلہ امتحان 2024 نانہہ اپنا مقررہ وقت 6 جولائی نانہہ ہی منعقد کیو جائے گو۔ این ٹی اے نے طالب علمان نانہہ ہدایت کی جے وے مزید جانکاری

www.NTA.ac.in

ور رابطو کریں۔

T20

آئی سی سی مردان غا ٹی 20 عالمی 2024 غا فائنل مقابلہ مانہہ اج بھارت غو مقابلو جنوبی افریقہ نال باربا ڈوس مانہہ وے گو۔ دوئے ٹیم اس ٹورنامنٹ مانہہ ناقابل شکست رہی ہیں۔ بھارتی ویلا غے مطابق یوہ مقابلو شام 8 بجے شروع وے گو۔

Weather

جموں مانہہ اج سویرے تیں ہی موسم خوشگوار ہے۔ چونکہ یوٹی مانہہ برسات غو موسم نیڑے آرہیو ہے۔ تے اس نال لوکاں نانہہ سخت گرمی توں تھوڑی راحت ملی ہے۔ اس دوران جموں مانہہ گذشتہ تہاڑے غو زیادہ توں زیادہ درجہ حرارت 38 عشاریہ 6 ڈگری سلیسیس ریکارڈ کیو گیو ہے تے اُتے پچھلی رات غو کھٹوں کھٹ درجہ حرارت 27 عشاریہ 7 ڈگری سلیسیس ریکارڈ کیو گیو ہے۔

اس غے نال ہی خبراں غو یوہ بلیٹن ختم ہوؤ۔